

Léon Spariat

# Lou Sant Aloi de Broussinet



**C.I.E.L. d'Oc**

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

# LA COUNVERSIOUN DE SANT ALOI

## I

Noste Segne Diéu lou Paire, un jour, en Paradis èro apensamenti. L'enfant Jèsu ié venguè:

— Paire, qu'avès?

— Ai, respoundeguè Diéu, un pensamen que me tavanejo... Tè, regardo eilavau.

— Ounte? diguè Jèsu.

— Pereilavau, dins lou Limousin, à dre de moun det: veses bèn dins aquéu vilage, vers la bourgado, une boutigo de manescau, uno bello e grando boutigo?

— Vese.

— Eh! bèn, aqui se trovo un ome qu'auriéu vougu sauva. lé dison mèste Aloï. Es un ome de la bono, óusservaire fidèu de mi coumandamen, caritadous au paure, serviciable pèr quau que fugue, d'un bon comte emé la pratico, e tabassant d'uno aubo à l'autro sèns mau parla ni renega... O, me semblavo digne de veni un grand sant.

— E quau empacho? diguè Jèsu.

— Soun ourguei, mon enfant! Pèr amor qu'es un oubrié de la proumiero man, Aloï crèi que sus terro noun i'ague res au-dessus d'éu; e la cresènço meno perdre.

— Moun Segne Paire, faguè Jèsu, se me voulias permettre de davala sus terro, assajariéu de lou counverti.

— Vai, moun bèu drole!

E lou bon Jèsu davalè.

## II

Vesti en apendris, soun paquetoun darrié l'esquino, lou divin mesteirau arribo dre dins la carriero ounte demouravo Aloï. Sus la porto d'Aloï i'avié l'ensigno, e l'ensigno pourtavo aquest escri: Aloï lou manescau, mèstre sus tóuti li mèstre, forjo un ferre dins dos caudo.

Lou pichot aprendis met dounc lou pèd sus lou lindau, e levant soun capèu:

— Diéu vous lou doune bon, mèstre, e 'n touto la coumpagno! S'avias besoun d'un pau d'ajudo?

— Pas pèr aro, respond mèste Aloï.

— Adessias dounc, sara pèr un autre cop.

E lou bon Jèsu countùnio soun camin. L'avié 'n roudalet d'ome que parlavon dins la carriero.

— Auriéu pas cresegu, diguè Jèsu en passant, que dins uno boutigo ansin, ounte ié dèu avé tant d'obro, me refusèsson lou travail!